



Ni Presidente Thomas S. Monson

Agbalin nga Ulidan ken Silaw

*No surotentayo ti pagwadan ti Mangisalakan,
addaantayto iti gundaway nga agbalin a silaw iti biag dagiti sabali.*

Kakabsat, maragsakanak a makaduakayo manen ita. Kas ammoyo, manipud pay idi nagkakaduatayo idi Abril, nagladingitayo iti ipapanaw ti tallo kadagiti ayayatentayo nga Apostol. Da Presidente Boyd K. Packer, Elder L. Tom Perry, ken Elder Richard G. Scott. Nagsubli-dan iti pagtaenganda iti langit. Malaglagiptayo ida. Agyamantayo kadagiti pagwadan ti ayat a kas ken Cristo ken dagiti makaparegta a pannursuro nga imbatida kadatayo amin.

Idanonmi ti naimpusuan nga isasangbay dagiti kabaruan nga Apostoltayo, da Elder Ronald A. Rasband, Elder Gary E. Stevenson, ken Elder Dale G. Renlund. Dagitoy dagiti lallaki a naanep iti aramid ti Apo. Maikarida unay kadagiti napapateg a pagrebbengan a nakaawaganda.

Itay kallabes, binasbasak ken inutobko dagiti nasantuan a kasuratan, nagtalinaed iti panunotko ti dua a binatog. Agpada a pamiliar kadatayo. Ti umuna ket naggapu iti Kaskasaba iti Bantay: “Kasta koma ti panaglawag ti silawyo iti sanguanan dagiti

tao, tapno makitada dagiti naimbag nga aramidyo, ket dayawenda koma ni Amayo nga adda sadi langit.”¹ Ti maikadua a nasantuan a kasuratan a napanunotko bayat ti panangutobko iti kaipapanan ti umuna. Naggapu daytoy iti Surat ni Apostol Pablo ken ni Timoteo: “Sika koma ti ulidan kadagiti mamati, iti sao, iti pannakisarita, iti ayat, iti espiritu, iti pammati, iti kinadalus”² (Timoteo 4:12).

Mamatiak nga ilawlawag ti maikadua a nasantuan a kasuratan, iti dakkel a paset, no kasano a maipatungpal-tayo ti umuna. Agbalintayo nga ulidan kadagiti mamati babaen ti panagbiagtayo iti ebanghelio ni Jesucristo iti sao, iti pannakisarita, iti ayat, iti espiritu, iti pammati, ken iti kinadalus. No aramidentayo daytoy, agraniagto ti silawtayo a makita dagiti sabali.

Immay ti tunggal maysa kadatayo iti daga a naikkanen iti Silaw ni Cristo. No surotentayo ti pagwadan ti Mangisalakan ket agbiag a kas iti insurona, agrarayto dayta a silaw iti unegtayo ket lawagannanto ti dalan para kadagiti sabali.

Ilista ni Apostol Pablo ti innem a kababalin ti maysa a mamati, kababalin a mangpalugodto kadagiti silawtayo nga agraniag. Saggaysaentayo dagitoy.

Dakamatek nga aggiddan ti umuna a dua a kababalin—panagbalin nga ulidan iti sao ken iti pannakisarita. Dagiti sao wenno balikas nga usarentayo ket mabalin a mangpapigsa wenno mangparegta, wenno mabalinda a mangpasakit wenno manguyaw iti tao. Iti lubong ita adda dagiti dakes a sao a mangmangngegtayo sadino man ti papanantayo. Narigat a maliklikan a denggen a maus-usar dagiti nagan ti Dios a gagangay ken awan panagdayaw. Dagiti bulgar a panagsasao ket kasla gagangayen iti telebision, pelikula, libro, ken musika. Maibassawang dagiti makadadael ken makagura a panagsasao. Makisaotayo kadagiti dadduma nga addaan ayat ken respeto, pagtalinaeden a kanyon a nadalus ti panagsasaotayo ken liklikan dagiti balikas ken masao a mangdangran wenno mangpasakit iti tao. Masurottayo koma ti pagwadan ti Mangisalakan, a nagsao nga addaan iti panagpabus-oy ken kinasingpet iti unos ti panagserbina.

Ti sumaruno a kababalin a dinakamat ni Pablo ket ayat, nga nailawlawag a kas “ti natarnaw nga ayat ni Cristo.”³ Mamatiak nga adda iti sakup ti impluensiatayo dagiti malidlidayan, dagiti masaksakit, ken dagiti makarikna iti pannakapaay wenno maawanan iti namnama. Daytoy ti gundawaytayo a mangtulong kada-kuada ken mangpapigsa iti pakina-kemda. Nangted ti Mangisalakan iti namnama kadagiti napukawan iti

namnama ken pigsa kadagiti naka-puy. Inagasanna dagiti masakit; inaramidna a makapagna ti pilay, makakita ti bulsek, ken makangngeg ti tuleng. Pinagungarna pay ti natay. Iti unos ti panangserbina tinulonganna nga addaan iti ayat ti asino man nga agkasapulan. No tuladentayo ti pagwadanna, mangbendisiontayo kadagiti biag, agraman ti bukodtayo a biag.

Sumaruno, agbalintayo nga ulidan iti espiritu. Para kaniak kayatna a sawen nga ikarigatantayo a maaddaan iti biagtayo ti kinasingpet, panagyaman, pammakawan, ken pagsayaatan. Dagitoy a galad ti mangtedto kadatayo iti espiritu a mangsagid iti biag dagiti tao nga adda iti aglawlawtayo. Naaddaanak iti gundaway iti uneg ti adu a tawen a nakipulapol iti adu a tao nga addaan iti kasta nga espiritu. Mapadasantayo ti naisangsangayan a rikna no makaduatayo ida, rikna a mammagusto kadatayo tapno makapulapol ida ken mangsuot iti pagwadanda. Agsilnag kadakuada ti Silaw ni Cristo ken mangtulong kadatayo a mangrikna iti ayatna para kadatayo.

Tapno mailadawan a dayta a silaw nga aggapu iti nadalus ken mangayat nga espiritu ken mabigbig dagiti dadduma, iburayko kadakayo ti maysa a padas adun a tawen ti napalabas.

Iti dayta a panawen, nakipagkita dagiti lider ti Simbaan kadagiti opisial ti Jerusalem tapno mangaramid iti pannakitulag para iti panagupa iti daga a pangpatakderan iti Sentro ti Jerusalem iti Simbaan. Tapno magun-od dagiti kasapulan a pammalubos, nasken nga umanamong ti Simbaan nga awan ti maaramid a panagproselayt dagiti miembro a mangusar iti sentro. Kalpasan ti pannakaaramid dayta a panagtinnulag, maysa kadagiti opisial ti Israel, a makaam-ammo unay iti Siimbaan ken dagiti miembro daytoy, kinunana nga ammona a tungpalento ti Simbaan ti panagtinnulag a saanda nga agproselayt. “Ngem,” kinunana, a mangitududo kadagiti estudiante a dumar-ayto idiay, “ania ti aramidentayto iti lawag

nga adda kadagiti matada?”⁴ Maka-pagraniag koma a kanayon dayta naisangsangayan a silaw iti unegtayo, tapno makita ken mabigbig dagiti dadduma ti pateg daytoy.

Tapno agbalintayo nga ulidan kadagiti mamati kayatna a sawen a nasken nga agtalektayo iti Apo ken iti balikasna. Kayatna a sawen nga adda kadatayo ken aywanantayo dagiti pammati a mangtarabayto kadagiti panunot ken tignaytayo. Ti pammatitayo ken ni Apo Jesucristo ken iti Nailangitan nga Amatayo ket makaimpluensia iti amin a nga aramidentayo. Iti baet ti pannakatikaw iti panawentayo, panaggiddiat dagiti kapanunotantayo, ken ti panagdandandag iti inaldaw a panagbiag, agbalin a maysa nga angkla iti panagbiagtayo ti napigsa a pammati. Saan nga aggid-dan a makapagtalinaed ti pammati ken duadua iti maymaysa a panunot, gapu ta iwaksi ti maysa ti sabali. Ulitek manen ti no ania ti naibaga kadatayo a nadagdagullit—a tapno magun-od ken mapagtalinaedtayo ti pammati a kasapulantayo, nasken a basaen ken adalen ken utobentayo dagiti nasantuan a kasuratan. Ti panakisarita iti Nailangitan nga Amatayo babaen ti kararag ket napateg unay. Ditayo kabaelan a liwayan dagitoy a banag, gapu ta awan sarday ti kabusor ken dagiti kamponna nga agsapul iti lamat iti kalasagtayo, a mangpakapuy iti kinapudnotayo. Kinuna ti Apo, “Agsukisokkayo a sireregta, agkararagkayo a kanayon, ken mamatikayo, ket agkaykaysa ti amin a banag para iti pagimbaganyo.”⁵

Kamaudiananna, nasken nga agbalintayo a natarnaw, a kayatna a sawen a nadalustayo iti bagi, panunot, ken espiritu. Ammotayo a ti bagitayo ket maysa a templo, a matrato iti panagraem ken panangrespeto. Nasken a mapno dagiti panunottayo kadagiti makapapigsa ken makapangayed a kapanunotan ken mapagtalinaed a nadalus manipud kadagiti banag a makaparugit. Tapno maaddaan iti Espiritu Santo a kanayon a kadkaduatayo, nasken nga agbalintayo a maikari.

Kakabsat, ti kinatarnaw ti mangisangbayto kadatayo iti talna ti panunot ken mangpaikarinto kadatayo nga umawat kadagiti kari ti Mangisalakan. Kinunana, “Nagasat dagiti nadalus ti pusona; ta makitadanto ti Dios.”⁶

No mapaneknekantayo nga agbalin nga ulidan iti sao, iti pannakisarita, iti ayat, iti espiritu, iti pammati, iti kinadalus, maikaritayto nga agbalin a silaw iti lubong.

Makunak kadakayo amin, ken nangnangruna kadakayo nga agtutubo, a bayat ti panagtignay ti lubong nga umadayo nga umadayo kadagiti pagbatayan ken pangiwawan nga inted kadatayo ni managayat a Nailangitan nga Ama, maibukodtayto manipud iti kaaduan dagiti tao gapu ta naidumdumatayo. Maibukodtayto gapu ta disente ti panagkawestayto. Agbalintayo a naidumduma gapu ta ditayo agsasao iti dakes ken gapu ta ditayo mangmangan wenno agipa-pauneg kadagiti makmakan a makadangran iti bagitayo. Agbalintayo a naidumduma gapu ta liklikantayo dagiti saan nga umisu a panagangaw ken makaibaba iti dayaw a panagdillaw. Agbalintayo a naidumduma no ikeddengtayo ti saan a kumita kadagiti media a makaparugit iti dayaw ken makaibaba iti kinatao ken mangyadayo iti Espiritu kadagiti pagtaengan-tayo ken iti panagbiagtayo. Awan duadua a maibukodtayto no agaramidtayto kadagiti pili maipanggep ti moralidad—dagiti pili a mayannurot kadagiti pagbatayan ken pagrukodan ti ebanghelio. Dagita a banag a mamangbalin kadatayo a naidumduma manipud iti kaaduan ti lubong ket mangipaayda pay iti dayta a silaw ken iti dayta nga espiritu a manglawagto iti sumipsipngeten a lubong.

Masansan a narigat ti agbalin a naidumduma ken agbukod nga agmaymaysa iti kaaduan dagiti tao. Gangay nga agbutengtayo iti no ania ti panunoten wenno sawen dagiti dadduma. Makapaliwliwa dagiti balikas ti salmo: “Ni Jehova ti silaw ken salakanko; asino ti kabutengkonto? ni Jehova isu ti bileg ti biagko; siasino ti

pagbutengakto?”⁷ No aramidentayo a ni Cristo ti sentro ti biagtayo, masukatani dagiti butengtayo iti tured dagiti natibker a pammatitayo.

Awan kadatayo ti perpekto ti biagna, ken no dadduma, mabalina nadagsen dagiti karit ken problema a pakaipasanguantayo, a pakaigapuan tapno kumudrep ti silawtayo. Nupay kasta, iti tulong ti Nailangitan nga Amatayo, a buyogan ti suporta manipud kadagiti dadduma, masindiantayo manen dayta a silaw a manglawag manen iti bukodtayo a dalan ken makaitedtayo iti silaw a mabalina kasapulan dagiti dadduma.

Tapno mailadawan daytoy, iburayko kadakayo dagiti makaawis a balikas ti maysa a daniw nga immuna a nabasak adun a tawen ti napalabas:

*Nasabatko ti maysa a gaggannaet
iti sardam*

*Iggemna ti awanen segged a
pagsilawanna*

*Indiyayak kenkuana ti pagsilawak
Tapno mangsindi iti
pagsilawanna.*

*Madamdama pay dimteng ti bagoy
Ket namagpusipos iti lubong.*

*Ket idi agsardeng napigsa nga
angin
Silaw ti pagsilawak ket
nagawanen!*

*Nagsubli kaniak ti ganggannaet—
Adda pay la sindi ti pagsilawanna!
Iggemna ti napateg a silaw
Ket sinindianna ti pagsilawak!*⁸

Kakabsatko, dagiti gundawaytayo nga agraniag ket naipalawlaw kadatayo iti tunggal aldaw, iti ania man a kasasaadtayo a pakaipasanguantayo. No surotentayo ti pagwadan ti Mangisalakan, maaddantayo iti gundaway nga agbalin a silaw iti biag dagiti dadduma, miembroda man iti pamiliatayo ken gagayyemtayo, dagiti katrabahuantayo, kaam-ammotayo, wenna ganggannaetda.

Iti tunggal maysa kadakayo, kunak a dakayo ti anak ti Nailangitan nga Amatayo. Naggapukayo manipud iti sidongna tapno agbiag ken agnaed iti daytoy a daga iti sumagmamano a panawen, tapno agbalin a pagwadan ti ayat ken pannursuro ti Mangisalakan, ken situtered a mangpalawag iti silawyo tapno makita dagiti dadduma. No naggibusen ti biagyo ditoy daga,

no naaramidyon ti pasetyo, maitedto kadakayo ti nagloriaan a bendision a makapagsubli ken makipagnaed Kenkuana iti agnanayon.

Makapatalged dagiti balikas ti Mangisalakan: “Siak ti silaw ti lubong: isu a sumurot kaniak saanto a magna iti kasipngetan, ngem maaddaanto iti silaw ti biag.”⁹ Paneknekak maipapan Kenkuana. Isu ti Mangisalakan ken Mannubbottayo; ti Mangibabaettayo iti Ama. Isu ti Pagwadan ken pigsatayo. Isu “ti silaw nga aglawag iti kasipngetan.”¹⁰ Sapay koma ta agkari ti tunggal maysa kadatayo a dumdumngeng kaniak a sumurot Kenkuana, tapno iti kasta agbalin a naraniag a silaw iti sangalubongay, ikararagko iti nasantuan a naganna, kas ken ni Jesucristo ti Apo, amen.


DAGITI NAGADAWAN

1. Mateo 5:16.
2. 1 Timoteo 4:12.
3. Moroni 7:47.
4. Kitaen iti James E. Faust, “The Light in Their Eyes,” *Liahona*, Nob. 2005, 20.
5. Doktrina ken Katulagan 90:24.
6. Mateo 5:8.
7. Salmo 27:1.
8. Lon Woodrum, “Lamps,” *The Lighted Pathway*, Okt. 1940, 17.
9. Juan 8:12.
10. Doktrina ken Katulagan 6:21.

Dagiti Pannursuro para iti Panawentayo

Manipud iti Nobiembre 2015 agingga iti Abril 2016, dagiti adalen iti Melchizedek Priesthood ken Relief Society kadagiti maikapat a Domingo ket naisagana manipud iti maysa wenna ad-adu pay a bitla a naited iti sapasap a komperensia ti Oktubre 2015. Iti Abril 2016, mabalina mapili dagiti bitla manipud iti sapasap a komperensia ti Abril 2016 wenna Oktubre 2015. Pilien dagiti stake wenna district president no ania dagiti mensahe nga usarento kadagiti lugarda, wenna mabalinda nga idutok daytoy a pagrebbengan kadagiti bishop ken branch president.

Sidadaan a magun-od dagitoy a bitla iti adu a lengguahe iti conference.lds.org.



Ni Presidente Henry B. Eyring

Umuna a Mammagbaga iti Umuna a Panguluhen

Ti Espiritu Santo a kas Kadkaduayo

No agbiagtayo a maikari iti daytoy, maaddaantayo iti bendision ti Espiritu a mangkadmakadua kadayto, saan laeng a sagpaminsan no di ketdi kanayon.

Patpatgek a kakabsatko, agyamanak a makaduakayo iti daytoy aldaw ti Sabbath iti sapa sapasap a komperensia ti Simbaan ti Apo. Kas iti nariknayo, nariknak ti Espiritu Santo a mangipampaneknek kadagiti balikas ti kinapudno a nangngegantayo a naisao ken naikanta.

Ti panggepko ita ket mangpadakkel iti tarigagayyo ken determinasionyo a mangtunton iti sagut a naikari iti tunggal maysa kadayto kalpasan ti panagbuniagtayo. Bayat ti kompirmasiontayo nangngegtayo dagitoy a balikas: “Awatem ti Espiritu Santo.”¹ Manipud iti dayta a kanito, nagbalbaliw nga agnanayon ti biagtayo.

No agbiagtayo a maikari iti daytoy, maaddaantayo iti bendision ti Espiritu a mangkadmakadua kadayto, saan laeng a sagpaminsan, kas iti mapadpadasantayo iti agdama, no di ketdi kanayon. Ammoyo manipud kadagiti balikas ti kararag ti sakramento no kasano a maipatpatungpal dayta a kari: “O Dios, Agnanayon nga Ama, dawatenmi kenka iti nagan ti

Anakmo, ni Jesucristo, a bendisionan ken pasantuem daytoy a tinapay kadagiti kararua dagiti amin a mairanud iti daytoy; tapno lak-amenda a silalagip iti bagi ti Anakmo, ken paneknekanda kenka, O Dios, Agnanayon nga Ama, tapno siaayatda a mangawat iti nagan ti Anakmo, ken kanayon a laglagipenda, ken tungpalenda dagiti bilin nga intedna kadakuada, tapno kanayon nga agtaeng kadakuada ti Espirituna.”

Ket kalpasanna umay ti nadayag a kari: “Tapno *kanayon* nga adda kadakuada ti Espirituna a mangkadmakadua kadakuada” (DkK 20:77; naainayon ti panangyunay-unay).

Tapno maaddaan a kanayon ti Espirituna a mangkadmakadua kadayto ket maaddaan iti pannarabay ken panangiturong ti Espiritu Santo iti inaldaw a panagbiagtayo. Kas pagarigan, mabalinnatayo a ballaagan ti Espiritu tapno mapagkedkedan ti sulisog nga agaramid iti dakes.

Iti dayta laeng a gapu, nalaka a makita no apay a pinadas dagiti

katulongan ti Apo ti mangnayon iti tarigagaytayo nga agrukbab iti Dios kadagiti mitingtayo iti sakramento. NO makiranudtayo iti sakramento a sipapammati, masaluadannatayo ti Espiritu Santo ken dagiti ipatpategtayo manipud kadagiti pannulisog a dumteng a nakarkaro ken masansan.

Ti panangkadmakadua ti Espiritu Santo ket aramidenna nga ad-adda a makaay-ayo ti nasayaat ken saantayo a nalaka a masulisog. Nasken nga umdas koma daytan a gapu a mangaramid kadayto a determinado nga agbalin a maikari iti Espiritu a mangkadmakadua kadayto a kanayon.

Kas iti panangpapigsa kadayto ti Espiritu Santo a maibusor iti dakes, ikkannatayo pay iti bileg a mangilasin iti kinapudno manipud iti kinapalaso. Ti kinapudno a kapatgan iti amin ket mapaneknekan laeng babaen ti paltiing manipud iti Dios. Ti kinasaririttayo ken ti panangusar kadagiti panagriknatayo ket saan nga umdas. Agbibigtayo iti maysa a panawen nga uray ti kasiriban ket marigatan a mangkita iti pagdumaan ti kinapudno iti nasikap a panangallilaw.

Insuro ti Apo ni Apostol Tomas, a nagtarigagay iti pisikal a pakakitaan ti Panangungar ti Mangisalakan babaen ti panangsagidna kadagiti sugatna, nataltalged a pakakitaan dayta a paltiing: “Kuna kenkuana ni Jesus, gapu ta nakitanak, Tomas, mamatika: nagasat dagiti saan a makakita ket namatida” (Juan 20:29).

Dagiti kinapudno a mangipakita iti dalan nga agawid iti pagtaengan ti Dios ket paneknekan ti Espiritu Santo. Ditayo mabalina ti mapan iti kakaywan ket makitatayo ti Ama ken ti Anak a makisarsarita iti ubing a ni Joseph

Smith. Awan ti pisikal aa pakakitaan wenna ania man a nainrasonan nga argumento a mangipakita nga immay ni Elijah kas naikari tapno itedna dagiti tulbek ti priesthood nga igiggaman ken us-usaren itan ti maysa a sibibiag a propeta, ni Thomas S. Monson.

Umay ti pammatalged ti kina-pudno iti maysa a lalaki wenna babai nga anak ti Dios a nangtunton iti karbengan nga umawat iti Espiritu Santo. Gapu ta mabalin a maidatag kadatayo dagiti kinapalso ken kina-ulbod iti ania man nga oras, kasapulantayo ti kanayon nga impluensia ti Espiritu ti Kinapudno tapno ditayo makapagduadua.

Idi ginuyugoynatayo ti maysa a miembro ti Korum dagiti Sangapuloket-dua nga Apostol, ni George Q. Cannon, a nasken a kiddawentayo a kanayon ti Espiritu a mangkadmada kadatayo. Inkarina, ken kasta met nga ikarik daytoy, a no aramidantayo dayta, datayo ket “ditayo agkurang iti pannakaammo iti kaano man” maipapan ti kinapudno, “saantayo nga agduadua iti kaano man wenna adda iti kasipngetan,” ket “pumigsanto ti pammatitayo, mapno ti . . . rag-o[tayo].”²

Kasapulantayo a kanayon dayta a tulong manipud iti panangkadmada ti Espiritu Santo para iti maysa pay a gapu. Mabalin a dumteng a di namnamaen ti ipapatay ti maysa nga ipatpateg iti biag. Ti pammaneknek manipud iti Espiritu Santo maipapan iti kinapudno ti maysa a managayat a Nailangitan nga Ama ken ti nangungar a Mangisaalakan a mangmangted kadatayo iti namnama ken liwliwa iti ipapanaw ti maysa nga ipatpateg iti biag. Nasken nga addaa kadatayo dayta a pammaneknek no mataytayo.

Isu a, para iti adu a gapu, kasapulantayo ti kanayon a panangkadmada ti Espiritu Santo. Tarigagayantayo daytoy, ngem ammotayo manipud iti padas a saan a nalaka a pagtalinaeden daytoy. Tunggal maysa kadatayo ket agpanunot, agsao, ken agaramid kadagiti banag iti inaldaw a panagbiagtayo

a mabalin a makapasakit iti Espiritu. Insuronatayo ti Apo a ti Espiritu Santo ti agbalin a kanayon a kadkaduatayo no napno ti pusotayo iti kinamanangngaasi ken no taraonan ti saguday ti pampanunottayo nga awan ressatna (kitaen iti DkK 121:45).

Para kadagiti marigatan a mangtungpal iti nangato a pagrukodan a kasapulan tapno maikari iti sagut ti panangkadmada ti Espiritu, idiyak daytoy a pammaregta. Naaddaankayon kadagiti panawen a pannakariknayo iti impluensia ti Espiritu Santo. Mabalin a napasamak daytoy kenka itan.

Mabalinmo nga ibilang dagita a kanito ti pammaregta a kasla iti bukel ti pammati nga inladawan ni Alma (kitaen iti Alma 32:28). Imulayo ti tunggal maysa. Maaramidyo dayta babaen ti panagtignay segun iti parikna a nariknayo. Ti kapatgan nga inspirasion ket ti pannakaammoyo no ania ti kayat nga ipaaramid ti Dios kadakayo. No daytoy ket panagbayad iti apagkapullo wenna isasarungkar iti agladladingit a maysa a gayyem, nasken nga aramidentyo daytoy. Ania man daytoy, aramidentyo. No ipakitayo ti kinatallugodyo nga agtungpal, ad-adu nga impresion ti itedto ti Espiritu maipapan iti kayat ti Dios nga ipaaramid kadakayo para Kenkuana.

No agtungpalkayo, masansan nga umayto dagiti impresion manipud iti Espiritu, nga umasideg nga umasideg iti kanayon a panangkadmada. Dumakkelto ti bilegyo nga agpili iti rumbeng.

Maammuanoy no dagiti impresion nga agtignay para Kenkuana ket aggapu iti Espiritu imbes nga aggapu kadagiti bukodyo a tarigagay. No dagiti impresion ket mayannatup iti kinuna ti Mangisalakan ken dagiti sibibiag a propetana, mabalinyo a pilien ti agtungpal nga addaan panagtalek. Kalpasanna ibaonto ti Apo ti Espirituna a mangtulong kadakayo.

Kas pagarigan, no maawatmo ti naespirituan nga impresion a mangdayaw iti aldaw ti Sabbath, nangngaruna no kasla narigat daytoy, ibaonto ti ti Dios ti Espirituna tapno tumulong.

Dimteng dayta a tulong iti amak adun a tawen ti napalabas idi mapan isuna iti Australia tapno agtrabaho. Agmaymaysa isuna iti maysa a Domingo, ket kayatna ti mankiranud iti sakramento. Awan ti makitana nga impormasion maipapan kadagiti miting dagiti Santo iti Ud-udina nga Aldaw. Isu a rinugianna ti nagna. Nagkararag isuna iti tunggal pagkurusaran tapno maammuanna no ania a dalan ti pagsikuanna. Kalpasan ti pannagna ken panagsikkona iti uneg ti maysa nga oras, nagsardeng isuna tapno agkararag manen. Nariknana ti impresion nga agsikko iti maysa a kalsada. Iti saan a nabayag adda nangngegna nga agkankanta a naggapu iti kababaan a kadsaaran ti maysa nga apartment iti asideg. Simmirip isuna iti tawa ket nakitana ti sumagmamano a tattao a nakatugaw iti asideg ti lamisaan a naarpawan iti puraw a lupot ken naiparabaw dagiti bandeha ti sakramento.

Ita, mabalin a kasla saan unay a napateg kadakayo, ngem para kenkuana ket napateg unay daytoy. Ammona a naipatangpal ti kari ti kararag ti sakramento. “Kanayon a laglagipen isuna ken agtungpal kadagiti bilinna nga intedna kadakuada; tapno kanayon nga adda kadakuada ti Espirituna” (DkK 20:77).

Maysa laeng dayta a pagarigan ti panawen idi nagkararag ket kalpasanna inaramidna ti imbaga kenkuana ti Espiritu nga ipaaramid ti Dios kenkuana. Intuloyna nga inaramid daytoy iti uneg ti adu a tawen kas iti aramidantayo. Saan a kaano man nagsarita maipapan iti espiritualidadna. Intuloyna laeng nga aramidentayo dagiti babassit a banag para iti Apo a nariknana nga aramidentayo.

No kiddawen ti sumagmamano a grupo dagiti Santo iti Ud-udina nga Aldaw tapno agsao isuna kadakuada, aramidenna daytoy. Saan a napateg no 10 a tattao wenna 50 wenna kasano man ti bannogna. Imburayna ti pammaneknekna maipapan iti Ama, ti Anak, ken ti Espiritu Santo ken dagiti propeta no iparikna ti Espiritu

kenkuana nga aramidenna daytoy.

Dagiti kangatuan a pagrebbe-
nganna iti Simbaan ket iti Bonneville
Utah Stake high council, a nagparu-
tanna iti ruot iti bangkag ti stake, ken
nangisuro isuna iti klase iti Domingo.
Iti panaglabas dagiti tawen, no kasa-
pulanna daytoy, adda idiay ti Espiritu
Santo a kadkaduana.

Nakatakderak iti abay ni tatangko
iti maysa a siled ti ospital. Nakaidda
ni nanangko, ti asawana iti uneg ti 41
a tawen. Binantayanmi isuna iti uneg
ti adu nga oras. Nakitami nga umaw-
awanan ti saem manipud iti rupana.
Dagiti ramay ti imana, a sigud a naka-
gemgem, ket nakaukraden. Nakababa
dagiti takiagna iti sikiganna.

Ti sakit a gapuanan ti kanser iti
uneg ti adu a tawen ket aggibusen.
Nakitak ti talna iti rupana. Immanges
iti babassit, kalpasanna immanangsab,
ket kalpasanna nagidda a sitatalna.
Nakatakderkami idiay nga agur-uray a
makita no umanges isuna iti mamin-
san pay.

Kamaudiananna, kinuna ni Tatang
a siuulimek, “Nagawiden ti maysa a
bassit nga ubing a babai.”

Saan a nagsangit ni tatang. Dayta
ket gapu ta nabayagen idi a nalawag
nga impaawat ti Espiritu Santo ken-
kuana no asino ni nanang, sadino ti
naggapuanna, ken no ania ti nagbali-
nanna, ken sadino ti papananna. Adu
a gundaway a nagpaneknek ti Espi-
ritu kenkuana maipapan iti managa-
yat a Nailangitan nga Ama, maipapan
iti Mangisalakan a nangparmek iti
ipapatay, ken maipapan iti kinapudno
ti pannakailantip iti templo nga imbu-
rayna iti asawana ken pamiliana.

Nabayagen idi nga impanamnama
ti Espiritu kenkuana a ti kinasingpet
ken pammatina ti nangpaikari ken-
kuana iti panagsublina iti nailangitan
a pagtaenganna a pakalaglagipanto
kenkuana a maysa a nasayaat nga
anak ti kari ken mapasangbay iti pag-
taengan nga addaan iti pammadayaw.

Para ken ni tatangko, ad-adda pay
dayta ngem iti namnama. Inaramid
ti Espiritu Santo a pumudno daytoy
para kenkuana.

Ita, mabalin nga adda agkuna a
dagiti balikas ken pampanunotena
maipapan iti nailangitan a pagtae-
nganna ket maysa laeng nga arapaap,
a panagkuna ti maysa nga asawa
iti oras ti panagladingitna gapu iti
ipapatay ti asawana. Ngem ammona
a ti agnanayon a kinapudno laeng ti
wagas a pakaammuanyo iti daytoy.

Maysa isuna a sientista nga ag-
sapsapul iti kinapudno maipapan iti
langa ti lubong iti manipud pay idi
addan isuna iti husto nga edad. Inu-
sarna a naimbag dagiti ramit ti siensia
tapno idaydayaw isuna dagiti kapata-
dana iti amin a paset ti lubong. Kaa-
duan dagiti inaramidna iti chemistry
ket naggapu iti molecule a nailada-
wana iti panunotna nga aggarga-
raw ket kalpasanna pinatalgedanna
daytoy babaen kadagiti eksperimento
iti maysa a laboratorio.

Ngem sabali a wagas ti inusarna iti
panangtakuatna kadagiti kinapudno a
napateg unay kenkuana ken iti tung-
gal maysa kadatayo. Babaen laeng iti
Espiritu Santo a makitatayo dagiti tao
ken paspasamak a kas iti panangkita
ti Dios kadakuada.

Nagtultuloy dayta a sagut iti
ospital kalpasan ti ipapatay ti asa-
wana. Inummongmi dagiti gargaret ni
nanangko tapno yawid. Nagsardeng
ni tatang tapno agyaman iti tunggal
nars ken doktor a masabatmi iti iru-
ruarmi a mapan iti kotse. Malagipko a
nariknak, nga addaan pannakasuron,
a nasken a pumanawkami tapno da-
kami laeng iti panagladingitmi.

Maamirisko itan a nakitana dagiti
banag a ti laeng Espiritu Santo ti ma-
kaipakita kenkuana. Nakitana dagita
a tao kas anghel nga imbaon ti Dios a
mangaywan iti patpatgenna. Mabalin
nga imbilangda dagiti bagida kas pro-
fesional nga agay-aywan iti salun-at
ken mangngagas, ngem agyamyaman
ni Tatang kadakuada iti serbisioda iti
nagan ti Mangisalakan.

Nagtultuloy ti impluensia ti Es-
piritu Santo kenkuana agingga iti
isasapengpetmi iti pagtaengan dagiti
nagannak kaniak. Nagsaritakami iti
sumagmamano a minuto iti salas.

Nagpakada ni Tatang a mapan iti
siledna iti asideg.

Kalpasan ti sumagmamano a mi-
nuto, nagsubli isuna iti salas. Narag-
sak nga umis-isem isuna. Immasideg
kadakami ket kinunana a siuulimek,
“Madanaganak amangan ta sumang-
pet ni Mildred nga agmaymaysa iti
lubong ti espiritu. Napanunotko ama-
ngan ta mapukaw isuna iti kaaduan
dagiti tao.”

Kalpasanna siraragsak a kinunana,
“Nagkararagak ita laeng. Ammok
a nasayaat ti kasasaad ni Mildred.
Adda idiay ni nanangko a sumabat
kenkuana.”

Malagipko nga umis-isemak idi
kinunana dayta, a pampanunotek ni
lelangko, dagiti babassit a luppona
nga agtartaray, nga agdardaras a
magna iti kaaduan dagiti tao tapno
masiguradona nga adda isuna sadiay
a mangsabat ken mangarakup iti
manugangna a babai iti isasangpet
daytoy.

Ita, maysa kadagiti rason no apay
kiniddaw ken inawat ni tatang dayta a
pannakaliwliwa ket gapu ta kanayon
a nagkararag isuna a sipapammati
manipud pay kinaubingna. Kana-
yon idi a makaawat isuna kadagiti
sungbat iti pusona tapno mangted iti
liwliwa ken panangiturong. Mainayon
iti nakaugaliannan a panagkararag,
ammona dagiti nasantuan a kasuratan
ken dagiti balikas dagiti sibibiag a
propeta. Isu a mailasina dagiti pami-
liar nga arasaas ti Espiritu, a mabalin
a nariknayo met ita.

Ti panangkadkadua ti Espiritu ket
saan laeng a nagliwliwa ken nangta-
rabay kenkuana. Namagbalbaliw day-
toy kenkuana babaen ti Pannubbot
ni Jesucristo. No awatentayo dayta a
kari a makaduanatayo a kanayon ti
Espiritu, maikkannatayo ti Mangisa-
lakan iti pangpatarnaw a kasapulan
para iti agnanayon a biag, ti kaindak-
lan iti amin a sagut ti Dios (kitaen iti
DkK 14:7

Malagipyo dagiti balikas ti Ma-
ngisalakan: “Ita daytoy ti bilin:
Agbabawikayo, amin nga adda iti
daga, ket umaykayo kaniak ket

mabuniagankayo iti naganko, tapno mapasantokayo babaen ti panangawat ti Espiritu Santo, tapno makapagtak-derkayo nga awan mulitna iti sangok iti ud-udina nga aldaw” (3 Nephi 27:20).

Karagpin dagita a bilin daytoy a kari manipud iti Apo:

“Ket ita, pudno, pudno, kunak kenka, itdem ti panagtalekmo iti dayta nga Espiritu a mangidalan iti panagaramid iti nasayaat—wen, nga agaramid iti nainkalintegan, a magna a sipapakumbaba, a mangukom a sililinteg; ket daytoy ti Espirituk.

“Pudno, pudno, kunak kenka, itdekto kenka ti Espirituk, a mangpalawag iti panunotmo, a mangpunno iti kararuam iti rag-o” (DkK 11:12–13).

Paneknekak kadakayo a sibibiag ti Dios Ama, nga idadauluan ti nangungar a ni Jesucristo ti Simbaanna, nga ig-iggaman ni Presidente Thomas S. Monson ti amin a tulbek ti priesthood, ken ti paltiing babaen ti Espiritu Santo ti mangtartarabay ken mangtultulong iti Ti Simbaan ni Jesucristo dagiti Santo iti Ud-udina nga Aldaw ken dagiti napakumbaba a miembrro daytoy.

Paneknekak pay kadakayo a dagitoy nasayaat a lallaki a nagsarsarita kadaytoy ita nga aldaw kas saksi ni Apo Jesucristo, kas miembro ti Korum dagiti Sangapulo-ket-dua nga Apostol, ket inawagan ti Dios. Ammok nga inturong ti Espiritu ni Presidente Monson tapno mangawag kadakuada.

Ken no dumngegkayo kadakuada ken dagiti pammaneknekda, patalgedan ti Espiritu Santo kadakayo no ania ti isaok ita kadakayo. Isuda dagiti inawagan ti Dios. Kanunongak ida ken ay-ayatek ida ken ammok nga ayayaten ti Dios ida ken tulongannanto ida iti panagserbida. Ket aramidek daytoy iti nagan ni Apo Jesucristo, amen.

DAGITI NAGADAWAN

1. *Handbook 2: Handbook 2: Administering the Church* (2010), 20.3.10.
2. Kitaen iti George Q. Cannon, iti “Minutes of a Conference,” *Millennial Star*, Mayo 2, 1863, 275–76.